



MSM sasar eksport 45,000 tan gula kasar ke China tahun ini

Wartawan BH

bhbiz@nstp.com.my

August 30, 2024 @ 3:37pm



Lokasi MSM Johor adalah geo-strategik untuk memenuhi permintaan yang semakin meningkat di China - Gambar ihsan MSM

KUALA LUMPUR: MSM Malaysia Holdings Bhd (MSM), pengeluar jenama gula bertapis terkemuka negara 'Gula Prai', mengumumkan jangkauan pasarannya yang diperluas dengan perjanjian eksport gula kasar ke China, salah satu daripada lima destinasi eksport terbesar untuk MSM termasuk Filipina, Singapura, Indonesia dan Vietnam.

Pada 2022, eksport gula MSM ke China berjumlah 16,258 tan. Angka ini meningkat lebih daripada dua kali ganda kepada 32,790 tan pada 2023, menyerlahkan keupayaan pengeluaran MSM yang mantap dan mengukuhkan reputasinya untuk memberikan produk yang memenuhi piawaian antarabangsa.

Peningkatan ketara ini menunjukkan bahagian pasaran MSM yang semakin meningkat dalam pasaran gula China.

Hubungan perdagangan MSM dengan China bermula pada 2019 dengan pembekalan gula cair kepada perusahaan makanan dan pertanian terkemuka China.

Perkongsian ini kini telah berkembang termasuklah eksport gula kasar.

Di bawah perkongsian ini, MSM akan mengeksport gula kasar berkualiti tinggi ke China melalui China Food Trading (COFCO), mencerminkan komitmen kedua-dua syarikat terhadap kecemerlangan dan amalan mampan.

Ketua Pegawai Eksekutif Kumpulan MSM, Syed Feizal Syed Mohammad, berkata, kejayaan penghantaran percubaan 1,000 kilogram gula kasar pada 2023 merupakan peristiwa penting bagi MSM.

"Untuk 2024, kami mengunjurkan mengeksport 45,000 tan gula kasar ke China. MSM mempunyai sasaran 100,000 hingga 200,000 tan setahun dalam jangka sederhana untuk China dengan ruang kapasiti yang tersedia dari kilang penapisan MSM Johor melalui program peningkatan yang berterusan.

"Perjanjian penting ini menggariskan fokus strategik MSM pada pengembangan pasaran antarabangsa dan seterusnya mengukuhkan penerimaan kehadiran kami ke dalam pasaran China.

"Kami berbesar hati menerima kunjungan beberapa delegasi dari China di MSM Johor sejak tahun lalu. Lawatan ini mempamerkan kapasiti, kemudahan dan keupayaan MSM Johor sambil kami terus berusaha ke arah menjadi pusat penapisan gula bertaraf dunia, menekankan komitmen kami terhadap kualiti, kecemerlangan dan inovasi dalam industri," katanya dalam satu kenyataan.

Dengan penambahan dua gudang penyimpanan gula bertapis baharu, MSM Johor bersedia untuk mengembangkan kapasiti simpanan dalamannya, menambah kemudahan pembungkusan, dan mengurangkan pergantungan pada penyewaan gudang luar serta mencapai kecekapan kos rantaian bekalan yang lebih baik.

Lokasi MSM Johor adalah geo-strategik untuk memenuhi permintaan yang semakin meningkat di China dan menyokong matlamatnya untuk menjadi pusat penapisan gula bersepadu termasuk menawarkan produk nilai tambah

seperti gula cair dan pracampuran.

MSM kini mengeksport ke 20 negara di Asia Pasifik, Asia Selatan, Asia Barat, Eropah dan baru-baru ini, Amerika Utara yang memperoleh hasil eksport melebihi RM600 juta setahun.

Pendapatan eksport dijangka meningkat tahun ke tahun.

Sejak 1964, MSM telah mengukuhkan kedudukannya sebagai kilang penapisan gula negara yang terkemuka dan berada di antara 10 kilang penapisan gula terbaik di dunia.

MSM disenaraikan dalam Indeks FTSE4Good Bursa Malaysia (F4GBM) dan FTSE4GOOD Bursa Malaysia Syariah (F4GBMS), setelah meningkatkan inisiatif alam sekitar, sosial dan tadbir urus (ESG) yang diiktiraf oleh ambang penarafan Russel FTSE UK.

HEADLINE	MSM sasar eksport 45,000 tan gula kasar ke China tahun ini
MEDIA	Berita Harian - Online
DATE	30 Aug 2024, 03:37 pm
BY	Wartawan BH
LINK	https://www.bharian.com.my/amp/bisnes/korporat/2024/08/1291979/msm-sasar-eksport-45000-tan-gula-kasar-ke-china-tahun-ini